



ČUVAMO ŠUME, GRADIMO BUDUĆNOST

Apel Šumarstva „Prenj“ d.d. Konjic

Kako bi se preventivno uticalo na svijest građana o nastupanju kritičnog perioda nastanka šumskih požara, kada se požari brzo šire, i izazivaju velike materijalne i druge trajne štete na šumama i šumskom zemljištu preduzeće Šumarstvo „Prenj“ d.d. Konjic, apeluje na građane sa molbom- upozorenjem.

Apeluje se na **građane i izletnike** koji se kreću i nalaze u šumama i na šumskom zemljištu, da vode računa o mjestima na kojima pale vatru, odnosno, da ne pale otvorenu vatru na udaljenosti manjoj od 150 metara od ruba šume, gdje prijeti najveća opasnost od nastanka šumskih požara, kako se ne bi našli u situaciji da izazovu požar i time ugroze šumu, objekte i stanovništvo.

Zbog ekstremno visokih temperatura ovaj apel se posebno odnosi na **poljoprivrednike**, s obzirom da je nekontrolisano spaljivanje korova i organskog otpada, te ostavljanje neugašene vatre bez nadzora pri uređenju poljoprivrednih imanja čest uzrok požara. Napominjemo da se spaljivanje korova i drugog gorivog materijala vrši na odgovoran način, samo u periodu povoljnih vremenskih uslova i na površinama koje se mogu kontrolisati. Pri spaljivanju korova i drugog zapaljivog materijala, potrebno je ugasiti ostatke nesagorelih materija kako bi se spriječilo njihovo raznošenje vjetrom i pojava nekontrolisanog gorenja.

Također, upozoravamo građane da su zaposlenici nadležnih institucija, u skladu sa zakonskim propisima, obavezni da podnesu prijave protiv svih lica za koje se utvrdi da su odgovorna za izazivanje i nastanak šumskih požara te time ugrozili živote i zdravlje ljudi ili pričinili materijalnu štetu.

Izazivanje šumskih požara je krivično djelo koje podliježe strogim kaznama. U članu 317 Krivičnog zakona Federacije Bosne i Hercegovine, navedeno je da ko izazove šumski požar zbog kojeg nastupi šteta većih razmjera ili istovremeno izazove više šumskih požara, kaznit će se kaznom zatvora od jedne do osam godina. Osoba koja nehotično izazove šumski ili drugi požar, kaznit će se novčanom ili kaznom zatvora u trajanju do tri godine.

Ipak, od posebnog značaja je saradnja sa lokalnim stanovništvom i medijima, kako bi se podigla svijest o opasnostima od šumskih požara, jer jedino zajedničkim djelovanjem svih navedenih aktera, mogu se spriječiti katastrofe i zaštititi kuće, šume i imanja od požara. Zaštita od požara, mora biti briga čitavog društva i uz odgovorno ponašanje građana, može se spriječiti nastajanje istih.

Zbog svega navedenog apelujemo na građane da pripaze na svoje postupke koji mogu izazvati šumske požare, jer **ČUVAJMO ŠUME TO JE NAŠE ZAJEDNIČKO DOBRO.**

Ruovodilac ugoja, integralne zaštite i rasadničke proizvodnje
Ljevo Elma, MA.šum.